

欽
定
全
唐
文

欽定全唐文卷八百八十五目錄

徐鉉八

唐故德勝軍節度使檢校太保同中書門下平章
事扶風馬匡公神道碑銘

唐故道門威儀元博大師貞素先生王君碑

唐故左諫議大夫翰林學士江公墓誌銘

大唐故中散大夫檢校司徒使持節秦州諸軍事

兼秦州刺史御史大夫洛陽縣開國子賈宣公

墓誌銘

唐故泰州刺史陶公墓誌銘

唐故金紫光祿大夫檢校司徒行少府監河南方

公墓誌銘

唐故客省使壽昌殿承宣金紫光祿大夫檢校太

保使持節筠州諸軍事筠州刺史本州團練使

汝南縣開國男周公墓誌銘

欽定全唐文卷八百八十五

徐鉉八

唐故德勝軍節度使檢校太保同中書門下平章
事扶風馬匡公神道碑銘

夫道被萬物處其中者是曰賢人功濟橫流讓其先者方
稱君子施之則開物成務興廣業而同歸卷之則保族宜
家垂令名於必大是以長沙吳芮繁祉邁於三雄南陽賈
復賁寵隆於四七歷代以降靡不由之迄於我朝則扶風
公其人矣公諱仁裕字德寬其先扶風人子孫或從官於

徐方今爲彭城人也粵若萬邦作乂益有佐禹之功因封受氏奢有却秦之績公侯必復關西靡孟起之威文武未墜南郡被季長之德存乎譜牒無俟闡揚曾祖某祖某皆以鹵莽之氣當屯蒙之運不履王侯之事歸全父母之邦考某少負雄名爲武寧軍裨將才高位下厥用弗彰累贈尚書右僕射傳曰有明德而不顯當代後必有興者故其餘慶集於我公惟公克稟粹靈夙彰奇應方娠而神貺協夢旣生而異氣充庭宗族相驚閭里交慶識者謂之曰不意英物復鍾此兒天將啟之馬氏爲不朽矣長而爽邁輔

以博聞善無常師器以虛受乃皇圖中否赤縣淪災戰國
縱橫爭求策士孔門堂奧半作家臣公負先見之明審擇
君之義舉旗沛澤即授中涓定難京城仍參主簿而上方
從厯試允懋臣功經綸草昧諮訪遺闕公親侍左右日奉
謨猷能知四國之爲且掌賓客之禮勞無伐善夙夜不離
於公美則歸君論議莫窺其際出入二紀懋肩一心車服
以庸寵祿來假乃升朝序乃掌禁師以左領軍將軍兼總
丞相之兵衛申令惟一任衆惟睦推以恩信先之勤勞周
廬旣嚴軍事以簡考績稱最帝用嘉之遷檢校司徒遙兼

宿州刺史夫千騎之長可以圖功百城之權可以觀政中
外迭處仰惟舊章即授楚州刺史本州團練使旬服之際
邦賦是繁長淮之衝戎寄爲急公奉揚王畧遵舉詔條人
不易方計日而治徵爲右衛大將軍復領舊兵以衛相府
董齊之畧有踰於初明年改右金吾大將軍以扶風縣三
百戶爲封邑執金之職歷代雄重綿祀虛位公首居之內
訓却非之士外察苛留之禁熊羆宣力輦轂無塵及上允
膺內禪光啟建業寺府軍衛半存舊京委公留臺右師俾
率東夏即遷檢校太保改右天威副統軍進爵爲伯陝服

從入公有力焉及參告類之儀益光求舊之舉寵開幕府
遙領徐方進封侯郡定食千戶左輔之地王業所基藩屏
京師惟公攸賴乃移使節往鎮京口公慈惠著於郡國威
德洽於士心由是齊人向風期年報政加同中書門下平
章事廬州節度觀察等使自南北分隔戎華交馳合肥之
郊常制衝要故有台階之命以增外閫之威公於是謹斥
堠審號令習組練之士則聲如飈馳嚴堡障之備則勢若
山立虜不敢犯邊是以寧而察俗之方如南徐之理方當
矢謨帷帳薄伐關河渡江之誓旣陳汴渭之舟已具嗚呼

良圖未展早命不融春秋六十有三昇元六年閏三月五日薨於廬州公署上省奏震悼廢朝三日即用元甲之數式擬鐵山之功給於官司臨以中使奉常以視履考祥之義循貞心大度之美詳協公論易名曰匡即以其年四月七日備鹵簿儀衛葬於廬州合肥縣鄉里禮也公娶同郡萊氏封彭城郡君麗穠李之華親采蘋之職理內協鵲巢之詠從貴有魚軒之華某年月日先公而逝嗣子右弓箭庫使光庭東頭供奉官光祚閤門承旨光紹皆稟義方無忝遺烈家承膏粱之後而恭順克修職在紈綺之間而雅

素自若君子謂扶風公其有後乎夫碑頌之設有自來矣
琬炎之細既垂於茗華盤盂之微又參於警戒若乃道合
天眷忠存王家累輔翼之功而鐘鼎之報罔聞享將相之
賞而帶礪之誓弗渝時無間言沒有餘位故其宗廟之紀
金石之銘昭示來茲不可誣也小臣不學奉旨刊文庶使
計功稱德代遠而愈信披文相質事久而彌芬峴首之懷
靡盡昆吾之烈長存嗚乎哀哉其銘曰

益作朕虞實曰元凱崇基締業明德攸在維趙于蕃封移
族改祚實刊山源長巨海因枝別代峴渭來遷道德絳帳

勤王跼鳶流光襲祉暎後昭前懷黃結紫著簡成編誕發
材英肇惟明懿鼎角膺奇龜文履異博容汎愛入孝出悌
運有屯蒙器無疑滯爰初發迹雲從潛泉濯纓職幟拊翼
中涓良驥處服忘歸在絃樞機言行無競維賢繼繼從君
匪依履屐勤茲前爰周旋陞戟居國必聞在身無擇帝爰
允諧胙乃丕績惟彼淮泗疆以獫夷維此京浙纘以邦畿
封淮表浙惟惠惟威椒蘭在俗轅轍興思羣舒待理獫狁
孔棘帝謂侯氏纘服新息式固爾猷惠此廬國乃陟台階
俾藩于北龍旆四牡鉤膺鏤錫命服有煒光聲載揚獫狁

弭耳蚩氓嚮方上儀象物下謐飛蝗梁木或顛通川有逝
長城旣嚴哲人永瘁像著雲臺風存遐裔輟春盡思瞻山
隕淚信結殊俗悲深上旻丹碑旣刻列鼎書勲祁連不泯
庸器長存丕顯百代惟子有臣

唐故道門威儀元博大師貞素先生王君碑

原夫至道之先邈哉希矣書契以降可得而云黃帝堯舜
澄其源故垂衣恭已在宥天下伯陽仲尼道其用故建言
立德憲章無窮赤松羨門神而明之故輕舉上賓留侯商
皓變而通之故解景滅迹順是而下莫不由之故有縉紳

端委利萬物於廟堂之上葛巾蕙帶全陰功於塵埃之外
隱顯殊志趨舍同歸其人有終其魄不死闔風元圃羣帝
之密都赤城華陽仙聖之治所光靈肸蠁若在左右仁人
君子往往至焉見之於貞素先生王君矣君諱棲霞字元
隱華宗繼世積德所鍾生於齊得泱泱之風長於魯習恂
恂之教七歲神童及第十五博綜經史闕黨童子靡敢並
行東方諸侯爲之前席而仙才靈氣稟於自然塵纓世網
不可拘繫每名山獨往神契感通奇怪恍惚眾莫能測天
祐丁卯歲避亂南渡至於壽春感四海之分崩想八公之

遺跡於是解巾名路委質元門問政先生聶君師道見而
奇之授以法錄是日有綵雲皓鶴翔舞久之既而窮若士
之遨遊得東鄉之勝境道無不在善豈常師又從威儀鄧
君起遐受大洞真法元科祕旨動以諮詢福地仙源因而
棲託誅茅穿徑枕石漱流身既隱而名愈彰道既寂而節
彌苦桑田自改桂樹長留烈祖孝高皇帝方在賓門實來
作鎮紫炁表眞人之應青雲符好道之占君鶴書被徵褐
衣來見談天人之際講道德之原靡勞牧馬之迷自契順
風之問因從敦請來止建康有元貞觀者陳宣帝爲臧矜

先生之所作也。殿堂岑寂，水木清華，游焉息焉，以遂其好。每竹宮望拜，玉牒祕詞，叩寂求真，必君是賴。嘉祥靈應，世莫得聞。聖厯中興，恩禮殊重，加金印紫綬，號元博大師。烈祖嘗從容謂君曰：「吾不貪四海之富，惟以蒼生爲念。君對曰：「夫古之聖人，修其身而後及天下，天下待一人安而後又安。今天子勤勞萬幾，忘寢與食，身且不能自治，豈能治蒼生哉？」帝善其言，以百金爲之壽，其識度諒直又如此焉。今上嗣清淨之基，尊元默之化，諮諏賓敬，有踰於前。而君茅嶺夙心，老而彌篤。比年抗表請歸舊山，優詔惜之，又加

貞素先生之號旣而玉棺有命紫素告期葛洪見留不成
大藥少君捨去先夢繡衣保大壬子歲夏四月甲寅隱化
於元貞觀春秋六十有二恩旨痛惜賻錢二十萬道俗嗟
慕會葬數百人初君之處茅山也即良常洞之前相雷平
山之下披榛翦穢面壑臨流除地爲壇表朝眞之位因邱
設隧卜安神之室至是歸葬符夙願焉六月丙申發自京
師泝淮而上時畿內久旱川塗可揭是日大雨洪注騰波
卻流驚長堤踰重堰飄然利涉人不知勞昔周王有樂水
之朝宣尼有泗水之應校靈比德其殆庶乎君傳法度人

數逾累百有若元貞觀主朱懷德名先入室道極嚴師首
座孫仲之章表大德劉德光參受經法豫聞元祕永懷在
三之義願垂不朽之風威儀王可德首座陳希聲並仰高
山共刊貞石鉉也不佞夙承教義雖復仙凡異迹靜躁殊
途而誠心所感素交斯在徘徊祠宇邈若山河敬書峴首
之悲以伺遼城之歎其詞曰

於鑠子晉上賓於天亦有令孫窮神體元昔我來思世稱
其賢今我往矣人謂之仙至道希夷孰知其然華陽洞府
句曲風煙林芳橘葉地即芝田披文相質億萬斯年

唐故左諫議大夫翰林學士江公墓誌銘

公諱文蔚字君章其先濟陽考城人也昔高陽恢若水之
靈光有萬國伯益獲箕山之護克成夏功故其子孫延祚
丕顯茅土錫允圭組流光在漢者爲孝子在宋者爲忠臣
在梁者爲烈將在陳者爲詞臣長城旣封淮水亦絕辭周
粟而遠驚避嬴亂而深藏徙籍建安世爲大姓至於我王
考毗考秦皆以隱德清操垂爲門風惟公嗣奕葉之賢負
生知之異幼挺奇表夙韜殊量殫儒墨之祕奧窮文史之
菁英閭里歸仁宗黨稱孝於時天下未一遐方不寧公鄙

尺鷃之爲從黃鵠之舉類延州之觀樂同太史之探書升
名俊造從事河洛衰俗難佐天壤不支我烈祖孝高皇帝
王業始於江東仁風被於四裔公杖策高蹈款闕來儀府
朝肅以生風臺閣藹其增氣署宣州觀察巡官試祕書郎
遷水部員外郎賜緋魚袋王國初建改比部員外郎知制
誥於時天人協應獄訟攸歸舜禹相與言游夏不能措潤
色之任我則無慙旣受禪遷主客郎中知制誥如故俄而
眞拜仍賜金紫今上嗣位大禮聿修徙公爲給事中判太
常卿事時同軌胥會有司失職公與司門郎中蕭公儼博

士韓君熙載協力建議周行翕然由是祖功宗德之位定
大行昭名之義允功著高廟與天無窮明年拜御史中丞
矯枉持平無所顧憚坐庭劾宰相其言深切貶江州司士
參軍初國朝自王義之後曠數百年憲署之間舉無廢職
然未有危言激論如此之彰灼者也故權右振竦朝野喧
騰傳寫彈文爲之紙貴人心旣爾天鑑亦迴前所劾者或
免或黜公就加江州營田副使頃之徵爲衛尉卿俄拜右
諫議大夫充翰林學士權知貢舉出納密命樞機靡失登
進造士衡鑑無私聳禁署之清風著春官之故事薦賢之

賞行及於台司曳杖之期奄先於朝露春秋五十有二保
大十年八月二日卒於京師官舍皇上痛惜爲之廢朝送
死恤孤一從公賜有司考行易名曰簡卽以其年九月十
三日葬於某縣某里之原禮也長子翥祕書省正字次子
騫皆早卒今以從子翹爲嗣嗚乎哀哉公心平氣和貌古
神正雅好元理有方外之期尤善詞賦得國風之體去華
簡禮不以位望驕人憐才誘善不以威名傲物操履堅正
靡得動搖襟懷坦夷初無蒂芥謫居江楚恬然自足孜孜
色養烝烝孝心嘗爲詩云屈平若遇高堂在應不懷沙獨

葬魚此其心也江州節度使賈公崇以武立功以剛肅物
事公如師傅親公如兄弟時皆服公之重名而賢賈之樂
善也既歸京寓居公廨無以家爲二子繼亡一慟而已齊
生死於夢覺遺寵辱於錙銖古之達者何以過此嗚乎凡
我僚舊均哀共戚入黔婁之門間覽伯喈之經籍睇落日
以流慟愬秋風而沾臆企景行於高山勒哀詞於樂石其

詞曰

高陽之裔伯益之孫展矣君子載大其門爰翔爰集樂我
樹檀影纓幕府振藻西垣禮儀卒獲風憲攸端道行在時

業隆自我英英若人見義必果直指烈烈官鄰瑣瑣死生
以之何適不可允矣天鑒明哉主恩乃還宣室乃入修門
從容禁署密勿王言得才爲盛知人則難求尸宗伯載善
其官人必有終古無不死嗟嗟若人風流永已徐庶有母
鄧攸無子關里諸生荊州故吏謂之何哉啜其泣矣秋風
落木逝水成川昨朝飛蓋今日荒阡一邱殘照萬古愁烟
素車自返寶劍高懸高才兮直道共盡兮何言

大唐故中散大夫檢校司徒使持節泰州諸軍事
兼泰州刺史御史大夫洛陽縣開國子賈宣公

墓誌銘

公諱潭字孟澤洛陽人也周先同姓即列國之諸侯漢得名臣乃洛陽之才子攀鱗河北豈須方面之功借筴譙都自有良平之策源長派遠德厚流光史不絕書後將必大當先天之內禪也我七代祖黃門侍郎平陽公曾實演丕命及至德之中興也我六代祖黃門侍郎晉國公至實贊大猷曠古已還一家而已五代祖蓀衡州刺史高祖種司門員外郎曾祖昶太子司議郎祖琛河南密令皆有韜世之量濟眾之仁大位不躋餘慶斯洽考勣以經術擢太常

第以才用爲諸侯卿捍寇輸粟有勞王室於是佩金紫升
朝廷上疏論邠寧節度王行瑜恃功恣橫坐貶愛州掾及
行瑜就戮優詔徵還復出常州刺史鹽鐵江淮留後屬宗
社中絕官司解弛計吏未上哲人其萎公有世德之資負
夙成之器風神爽邁智術通明景福二年以學究一經射
策高第釋褐京兆府參軍事遷祕書郎侍從南遷進修不
懈天祐丁卯歲居先君憂服喪過哀宗黨稱孝楚泗郡守
宣城廉使虛左交辟三府馳名俄丁內艱感憂如禮義祖
武帝創基分陝側席求才素與公周旋卽加禮命奏記書

檄一以委之內贊謨猷外爲詞令出應盟會入陪樽俎霸
功光赫公有力焉十有餘年任用無間旣而楚雲告變穆
醴不陳已酬國士之知亦得退人之禮改宣池觀察判官
烈祖高皇帝受命中興不忘舊德徵拜祕書少監充儀禮
副使遷中書舍人崇英翰林學士周慎密命潤色王言公
望無渝朝獎彌厚保大嗣統拜兵部侍郎知制誥學士如
故充永陵儀禮副使同軌胥會大禮無違遷兵部尚書修
國史考定郊廟之樂褒貶歸正擊拊允諧會六夷南侵天
眷北顧命公持節使於契丹宣大國之威神得諸戎之要

領及輶軒還軫而控弦出塞矣報命稱旨時論具瞻於是
避寵台衡就安關輔除泰州刺史視事數月丕變土風遘
疾還京保大六年九月二十有一日卒於江寧永安里官
舍享年六十有八皇上軫悼再不視朝飾終之禮務從加
等太常考行賜諡曰宣以某年月日葬於某所與夫人楊
氏合祔焉禮也長子朝散大夫行大理司直彬次子泰州
司倉參軍穆少子修等咸負當世之才皆爲保家之主種
德垂範未易可量長女用文適水部員外郎楊元鼎不幸
早世次曰用柔適膳部員外郎知制誥張緯次曰用光適

進士姜某少曰季芳尚幼惟公事業富壽昭映一時族望
婚姻熏灼當代自非天監與善孰能若斯雖大用未光而
能事畢矣鉉以世親之舊執隨行之敬服義承教惟公在
焉刊勒論譔蓋感遇之萬一也其銘曰

於維茂族實有世德七葉繼軌嘉猷允塞亶矣君子其儀
不忒修辭立誠以匡王國言以文行兵由威克東畿之政
爲邦之則天地長在春秋代遷今朝喪善何日生賢蒿里
誰地佳城許年永安舊里門館依然寢邱傳邑京兆開阡
勒名泉石以配青編

唐故泰州刺史陶公墓誌銘

公諱敬宣字文裒其先潯陽人因官徙籍今爲合肥人也
西京作相開國侯於是貽孫南國主盟長沙公茲焉不朽
籬邊黃菊解縣印以言歸嶺上白雲挂朝衣而不返光靈
攸屬固無得稱之丹青所存可畧而言也高祖復右監門
衛將軍曾祖琳建州錄事參軍祖晟青州博昌縣令皆天
縱其能世濟其美韎韁君子屈迹於驍遊縉紳先生折腰
於州縣積善餘慶明德後興考雅武昌軍節度使贈太師
楚惠公雲雷構屯龍虎冥會橫凋戈而蕩寇功冠一時裂

鷄尾以疏封禮優萬戶公卽太師第四子也幼而岐嶷長而俊茂非禮勿動時然後言天祐中門廕起家太子校書遷至府長史賜緋魚袋丁先公憂時年十四孝心昭感喪禮無違釋服除都官郎中賜紫金魚袋改大理少卿青縑寓直時推伏閣之勤丹筆持平人絕署門之歎俄遷江都少尹趙張治劇由來表則之司淮海分疆自昔輕揚之地公處之貞固行以廉平愛民則忠事長以順一圻欣賴三載有成遷大理卿仍兼尹事烈祖孝高皇帝允釐百揆實總六師爰求鄭國之良以貳楚人之廣奏請君判左右軍

事丁酉歲堯咨文禪禹迹中興徵舊德於角犀考官成於
喉舌拜工部尚書今上嗣位加金紫光祿大夫檢校太保
會閩人作梗王旅欲南聲實所資豫章爲急故輟公副總
判軍府及羽檄四出芻輓相尋民以悅而忘勞事有備而
無患嶺表既定洪人亦康復移宛陵仍兼棣州刺史海陵
郡守海陵爲膏腴之地邦賦最優歲比不登民用胥怨公
以清淨爲理仁恕積中視吏民其如傷守法令而畫一餘
糧棲畝無庚癸之呼白駒過隙感辰巳之歲春秋五十有
二保大八年夏四月十有八日卒於位上省奏傷悼輟朝

兩日有司考行賜諡曰順卽於其年月日權窆於東都明
年某月日葬於江都府縣里與前夫人合祔焉禮也惟公
沖和體質仁孝爲基立身有常與物無忤尤善聲律聞音
而知樂頗好篇詠下筆而成章身後不留餘財所任必有
遺愛求之作者斯亦難能嗣子泰州司倉參軍崇鼎崇諒
崇倫等皆勤修令名夙奉成訓君恩靡替家法如初鉉昔
在朝行實惟舊好今從左宦仰繫東道痛死生之已矣感
意氣以何報延陵掛劍願保於不欺峴首刊碑終慙於絕
妙銘曰

淮淝之靈衡霍之精必有賢傑爲時而生乃伯乃仲乃侯
乃卿望冠六事風馳百城人生有涯大命夙傾不見君子
猶存政聲遠日旣吉靈輻旣行寂寞公館蕭條古垞哀哀
郡人泣涕沾襟嗚乎彼蒼不知福善之胡明

唐故金紫光祿大夫檢校司徒行少府監河南方

公墓誌銘

公諱訥字希仁其先河南人也後世從官徙籍新安支派
繁衍遂爲郡之著姓迨公數世皆以儒雅退讓播爲門風
曾祖禹登州文登縣令祖亮左武衛兵曹參軍考轂榮王

府司馬母聶氏追封河南縣太君問政先生師道之長女也公承積善之慶負夙成之智砥節礪行好學能文時然後言非禮勿動鄉曲之黨翕然稱之太師陶公來守新安撫納人士署爲郡吏委以典籤恪恭詳敏甚稱所職歷事累政其志如初烈祖肇基王業元宗實綜軍政管記之任勤擇其人聞公之名召致幕府王國初建署寧國軍節度館驛巡官掌都統表奏皇室再造慶賞遂行擢拜虞部員外郎掌元帥表奏數歲以皇孫就傅命公侍讀講道贊德勵裨益之誠端已直躬盡表微之節俄遷水部郎中明年

皇孫封南昌王東都留守以公爲留守判官遷主客郎中
參贊政務事無違者改司農少卿依前充職明年王移任
宣潤二州大都督復以公爲浙西營田副使通判軍府六
載匪懈庶職交修懋官之賞詔命疊委累遷至金紫光祿
大夫檢校司徒封河南縣男俄拜泰州刺史充本州屯田
監院使正身而令悉心爲理公無遺利民自從風屬強敵
深侵東京失守而州兵盡出人心大搖於是士庶老幼盡
室南渡公自歸闕下坐是除名數年除歙州團練判官上
曰戰爭之際吾豈以武勇責書生哉軍法不得不爾卽召

拜太子右諭德今上嗣位遷少府監丙寅歲正月十六日
卒於京師美仁坊官舍享年七十七上爲之廢朝一日賜
諡曰定以某年某月日葬於某所禮也前夫人謝氏早亡
繼室施氏封沛縣君長子前宣州寧國縣主簿次子志饒
州文學公以名教爲樂以矩矱自任行必中立居無惰容
縉紳之間推爲純行公之外祖得道之士故公頗以朝禮
修養爲務雞鳴而起孜孜不倦年俯悼耄體常康強及屬
纘之晨無伏枕之疾斯亦力行之報也鉉也不佞早辱交
契昔先君從事黜歛公適仕本部及公策名郎署鉉亦忝

金史卷之二十一
官聯既熟其素履願垂於不朽附於史氏以永令猷其銘
曰

聖人四教文行忠信惟公似之光有令聞秉筆贊畫登朝
典郡寵至若驚道喪無悶年俯中壽官參列卿歸全委順
終吉永貞宰樹長在高臺自傾用刊圓石闕此佳城

唐故客省使壽昌殿承宣金紫光祿大夫檢校太
保使持節筠州諸軍事筠州刺史本州團練使
汝南縣開國男周公墓誌銘

君諱廷構字正材洛陽人也岐山至德綿瓜瓞者萬邦洛

宅舊都守枌榆者百世簪組相繼譜牒存焉曾祖侃太常
博士祖潛深州樂壽縣令避亂南徙因家廣陵考延禧明
經擢第有吳之霸受辟爲淮南巡官累官至戶部郎中與
殷文公游貞公同掌文翰無祿早世故大位不躋君卽戶
部第四子也幼而岐嶷長而篤厚躬行孝弟餘力學文以
陰釋褐補宏文館校書試吏爲池州司戶參軍改宣州寧
國縣尉烈祖在藩乃睠舊族聞君修謹復有吏能因表爲
黃州長史寵以朱紱置之府朝及受禪遷通事舍人鴻業
肇興王澤遐布贊導之任實寄司聰護戎修聘觀風按獄

受命而出動罔不臧厯事兩朝任遇彌厚賞賜旣數階勲累遷而通事之任如故蓋惜其能也保大七年轉將作少監判四方館事浩穰之地尹正爲難復以本官判江寧府事其間監諸侯之典者十通四方之命者三攝州府之政者六按枉撓之獄者四或敷惠於新附之俗或投身於危亂之地本於忠而後動忘其生而後存元宗嘉之以爲客省使今上嗣位深惟舊勞特加金紫光祿大夫台州刺史常御壽昌殿視事中外之人咸得引見又以君爲壽昌殿承宣出爲忠義軍監軍泉州等州宣諭使還遷筠州刺史

本州團練使仍充客省使君以備嘗艱危復逼遲暮懇辭
繁劇恩旨不從丙寅歲十月二十二日終於京師某里之
官舍春秋六十有六詔廢朝一日賜諡曰某明年正月日
葬於某所禮也夫人天水縣君姜氏輔佐之勤率由婦禮
訓誨諸子備有義方子大理評事崇儉太常寺奉禮郎崇
素及崇順崇信等皆有儒謹能不墜其先鉉家世通舊嘗
接姻婭淡成之分終始不渝何以寘懷是用刊德其銘曰
猗嗟周君世濟其名展如之人克嗣厥聲受任幹蠱臨難
忘身居中處約全和保真與物皆化萬古同塵松楸勿伐

蘭菊惟新刊石表墓吁嗟善人

欽定全唐文卷八百八十六目錄

新文豐出版社發行

徐鉉九

唐故朝議大夫行尚書禮部郎中柱國賜紫金魚

袋太原王君墓誌銘

唐故奉化軍節度判官通判吉州軍州事朝議大

夫檢校尚書主客郎中驍騎尉賜紫金魚袋趙

君墓誌銘

唐故中書侍郎光政殿學士承旨昌黎韓公墓誌

銘

唐故朝議大夫守尚書刑部侍郎柱國賜紫金魚
袋喬公墓誌

唐故左右靜江軍都軍使忠義軍節度建州觀察
處置等使留後光祿大夫檢校太尉右威衛大
將軍臨潁縣開國子食邑五百戶陳公墓誌銘
唐故檢校司徒行右千牛衛將軍苗公墓誌銘

前知虔州雩都縣令包府君墓誌

唐故常州團練判官檢校尚書左僕射劉君墓誌

銘

唐故印府君墓誌銘

唐故銀青光祿大夫檢校國子祭酒御史中丞包
君墓誌銘

欽定全唐文卷八百八十六

徐鉉九

唐故朝議大夫行尚書禮部郎中柱國賜紫金魚

袋太原王君墓誌銘

君諱某字某其先太原人也昔者諸侯共職起末運於髡
王儲后上賓示靈期於瞽史緱山維岳啟翦賁之崇基汾
水遂荒導沈渾之遠派其後金行云季貴種言還行者制
禮樂於土中處者保邱園於淮左世濟之德鄉人所宗故
今爲廬江人也曾祖廬江令祖洪州長史皆有廉讓之風

純粹之行得祿於仕不累於高考吳尚書左司郎中贈太
府卿負適用之才獲愛人之譽應星辰而列位道邁朝倫
視河海以命官禮優贈典君則府卿之第三子也門風漸
教天質孕和翼翼服勤眞保家之主惓惓若訥多長者之
言墨妙筆精固稟於性奕思琴德咸是所長幼有令聞獲
鍾慈愛及加冠之歲以門子敘資漢室孝廉方從令史晉
時英俊更屈下僚晨昏之養有歸州縣之勞靡憚乾貞二
年自黃州司馬遷洪州都督府別駕治中懋績屏星煥其
增華公府見知佩刀由其受賜俄拜尚書度支員外再遷

虞部郎中皆判吏部兵部事夫當官匪懈伏閤之勤也照
奸得情坐曹之能也前史所建君皆則焉頃之以親累解
官君雅好元言夙尚閑適由是角巾私第閉關却埽交游
罕得見其面窮達不以介其懷用晦而明居貞以利高皇
帝受禪之始牽復疏恩拜工部郎中轉禮部郎中寓直中
書省豫聞機密彤庭宏敞禁垣清切絲綸之出堯言於是
惟行樞機之微省樹由其勿洩方將振鱗溟渤驤首雲霓
而生也有涯仁而不壽昇元六年夏六月二十有六日卒
於建康翔鸞里之官舍享年五十有一嗚呼哀哉惟君孝

於事親悌於承長和以接上廉以在公胥吏臣僕靡不被
仁恕之惠家人妻子未嘗見喜愠之容學古觀書如恐弗
及卹舊敬老周知其疲三德聿修五福斯闕卽世之日遺
愛存焉卜遠不從旅殯京邑後四歲春二月五日嗣子延
紹延貞等始備大葬之禮窆於江都縣某鄉里從先卿府
君大塋與夫人李氏合祔焉禮也鉉以世親之舊承子妻
之知怨明德之不常痛祖行之斯在退食自公薄送於畿
刊樂石以爰紀庶令名之不虧嗚呼哀哉其銘曰

汾川溶溶淮源颯颯興我宗今世濟其美家餘其慶生我

公兮靖恭正直言行名迹存南宮兮與義相扶知命不憂
永考終兮邗城之右蜀岡之陽馬鬣封兮道不虛行有令
之子遵遺風兮

唐故奉化軍節度判官通判吉州軍州事朝議大
夫檢校尚書主客郎中驍騎尉賜紫金魚袋趙
君墓誌銘

君諱宣輔字仲申其先天水人也累世從官不常厥居曾
祖全真工部員外郎滕州刺史祖倚太子校書考台歙州
海寧令君卽海寧府君第三子也生於廣陵長於江左幼

而俊敏博綜羣書尤善名法之學烈祖輔政方申明紀律
君以是中選釋褐補江都府文學直刑部明年改信州司
法參軍察獄詳刑號爲祥練久之召赴闕以本官權參元
帥府法曹事踰年改大理評事元宗嗣服之初精心庶獄
權要舉不附已者因中傷之君坐黜爲饒州司士參軍明
年王師伐閩護軍查君表君才可煩使以本官判軍司事
時頓兵深入自冬涉秋經束馬懸車之塗督飛芻輓粟之
役事集師克君有力焉師還加朝散大夫行常州義興令
推誠率下民用協和丁憂去職復爲江州錄事參軍時連

帥議浚湓浦以屯舟師詔從之君以無益戎備而勞民力
乃指陳利害抗疏極論上甚嘉之卽命止役由是遷大理
司直通判蘄州軍州事明年遷檢校水部員外郎充建州
觀察推官通判軍府事會越人鬬邊使聞誘建民將以爲
亂君廉得其實盡按誅之優詔褒美賜衣一襲遷檢校屯
田員外郎三年徵拜守水部員外郎判度支時師旅薦興
軍食不給命君爲松江催運使輶傳所至轉輸如流朝議
以姑孰居畿甸之間實供億之始徙君爲當塗令踰月復
徵爲主客員外郎判大理寺賜紫金魚袋始君以理官得

罪至是上知其無私故復任焉守官循理挺然中立轉工部員外郎仍判寺事今上嗣位上疏論時政以爲刺史縣令親民之先而考績掄才未盡其理上深然之遷朝議大夫戶部員外充宣歙常潤等道安撫使以刺舉無避爲權臣所排宸鑒昭明故得無咎使還以本官判兵部事廬陵羣盜充斥州兵不能制上憂之亟命君爲奉化軍節度判官判吉州事轉主客郎中擒姦摘伏克舉其職其年秋九月七日遇暴疾翌日終於郡之官舍享年六十有一明年春二月歸葬江寧府某所禮也夫人查氏吉王府長史昌

之女工部尚書文徽之妹婉孌之德閨房之秀內助著美
士林所推子七人長曰鈞袁州新喻尉次曰錯樞密院承
旨次曰鍾舉進士次曰銓前國子監三禮次曰鏐鉞鎮皆
國子監生女一人適祕書省正字周希定君有孝弟之性
聞於宗族敦然諾之信稱於友朋守已有常事君不諂位
未達而知足祿雖優而彌貧其當官持事也必盡已所長
不爲利回不爲威惕故屢失大臣意然好直之士亦以此
多之鉉多塵近職熟君操行直筆聳善以告後人故銘其
墓曰

金史卷之二十一 列傳二十一
三
英英趙君松茂蘭薰應用以法飾身以文道直詞正心平
氣純如何不淑今也爲塵金陵仙鄉古多名人歸骨於是
與善爲鄰泉臺不曉壟樹空春勒銘挂劍慷慨霑巾

唐故中書侍郎光政殿學士承旨昌黎韓公墓誌

銘

公諱熙載字叔言其先南陽人傳稱武王之穆詩美韓侯
受命晉以六卿升降漢以三傑重輕至東晉末征西從事
延之以忠義之節踐艱屯之運避亂遠徙遂家昌黎餘慶
流光最爲繁衍曾祖均太僕卿祖殷侍御史考光嗣祕書

少監淄青觀察支使故又爲齊人公秉夙成之智負不羈之才文高學深角立傑出年始弱冠游於洛陽聲名藹然一舉擢第同光之亂藩郡崩離公以國難方興家艱仍構瞻烏擇木杖策渡江烈祖孝高皇帝納麓在辰側席時彥得公甚喜賓禮有加於時有吳肇基庶事草創公以俊邁之氣高視名流旣絳灌之徒弗容亦季孟之間不處以校書郎釋褐出爲滁和常三州從事公亦怡然不以屑意詠風月游山水而已中興受命上嗣撫軍以公有七子之才膺四友之拜徵爲祕書郎掌東宮文翰元宗深器之及踐

位以爲虞部員外郎史館修撰賜緋又以大禮繁疊加太常博士時有司議孝高廟宜稱宗司門郎中蕭君儼上疏論之公與給事中江公文蔚協同其議凡書疏論難皆成於公手由是廟號尊諡定於一言君子以爲眞博士也頃之以本官權知制誥初公但以文章際會未嘗與政及其當維新之運感知已之恩未及聽政章疏相屬或駁正失禮或指摘時病由是大爲權要所嫉竟罷其職丞相宋公朝之元老勢逼地高公又廷奏黨與詞旨深切天子優容之而用事者滋怒旋貶和州司士參軍數年移宣州節度

推官徵還復爲虞部員外郎遷郎中史館修撰賜紫俄而
拜中書舍人從時望也公雖才識優瞻而質性疎散凡在
位者道復不同於是深居移病罕與朝謁時兵興之後國
用不充公援古酌今請以錢爲幣時獻計者甚衆元宗獨
以公議爲長卽拜戶部侍郎充鑄錢使今上踐位改吏部
侍郎兼修國史初鑄錢之作也自宰執而下相與沮之故
百司不供久未能就上爲之曉譬事理親加督責而公猶
不勝其忿嘗因對見聲色俱厲因徙爲祕書監不踰年復
拜吏部侍郎新錢旣行大濟經費詔賜錢二百萬拜兵部

尚書充勤政殿學士承旨公少而放曠不拘小節及年位俱高彌自縱逸擁妓女奏清商士無賢愚皆得接待職務既簡稱疾不朝家人之節頗成寬易雖名重於世人亦訝其太過上不得已左遷太子右庶子分司南都於是謝遣伎樂單車首路留之未幾復爲兵部尚書學士如故是時歲比旱歉主上憂勤公復論刑政之源明防救之術又上格言五篇手詔嘉納卽拜中書侍郎充光政殿學士承旨初上選近侍數臣直宿禁中常御光政殿召對夜分乃罷故命公此職以寵異之霖雨之望方深鐘漏之期遽逼春

秋六十有九庚午歲秋七月二十七日沒於京鳳臺里之
官舍上省奏震悼爲之涕流有司奏當輟朝三日手批天
不愆遺碎我瑚璉辭章乍覽痛切孤心嗟乎抗直之言而
今而後迨不得其過半聞聽者乎可別輟朝一日贈右僕
射平章事仍官給葬事士庶聞之知與不知莫不爲之悲
嘆有司考行易名曰文靖卽以其年九月某日葬於某所
禮也夫人隴西郡君李氏生簪纓之族有桃李之芳內則
有光夜川先逝繼室北海縣君蔣氏長子疇爲奉禮郎早
卒次子伉爲校書郎聰慧夙成無忝世德次曰佩曰份曰

儼曰佺曰儔曰俛女四人或作儷公族或爲尼出家嗚呼
哀哉公之爲人也美秀而文中立不倚率性而動不虞悔
吝聞善若驚不屑毀譽提獎後進爲之聲名片言可稱躬
自諷誦再典歲舉取實去華故其門人多至清列屢從譴
逐殆乎委頓俯視權幸終不降心見理尤速言事無避凡
章疏焚藁之外尚盈編軸焉審音妙舞能書善畫風流儒
雅遠近式瞻向使檢以法度加以慎重則古之賢相無以
過也俸祿旣厚賞賜常優忘懷取適不事生計身歿之日
四壁蕭然衣衾櫬槨皆從恩賜詔集賢院編其遺文藏之

祕閣凡所開卷可知也鉉與公鄉里遼夏年輩相懸一言
道合傾蓋如舊綢繆臺閣契濶江湖區區之心困而獲雪
一生一死何痛如之援毫反袂識彼陵谷其銘曰

猗嗟韓公有蔚其文俊才絕俗逸氣凌雲高名直道玉振
蘭薰猗嗟韓公天賦忠規君臣之際言行俱危其身可辱
其節寧虧猗嗟韓公屈亦能伸松寒益茂玉焚始真乃感
明主乃爲大臣送往事居不緇不磷嗚乎韓公胡爲而然
閱此相印歸於夜泉茂陵遺簡京兆新阡斯文不朽此別
終天哀哉郢匠已矣牙絃勒銘圓石永識桑田

唐故朝議大夫守尚書刑部侍郎柱國賜紫金魚

袋喬公墓誌

士有放懷夷曠介然中立外物無累於心沒齒不違於道
吾友喬公嘗從事於斯矣公諱匡舜字亞元廣陵高郵人
也曾祖譚祖泰皆不仕考鴻漸本縣尉家世清操州閭稱
之故其子孫必有興者公少好學善屬文弱冠游京都詞
藻典麗容止都雅烈祖輔政見而器之補祕書省正字丞
相宋楚公初獲進用位望日崇聞君之名辟置門下每爲
文賦詩詠輒加稱賞由是名譽日洽而卿士大夫皆前席

待之累遷大理評事司直監察御史屯田員外郎從宋公
出藩爲江西浙西掌書記府公告老歸九華山公乃升朝
爲駕部員外郎未幾守本官知制誥就遷祠部郎中中書
舍人典掌樞機周慎靜默凡十餘年值邊境倂擾師出無
功詔旨親征中外憂懼公上疏極諫坐沮撓軍勢黜居臨
川頃之宋公獲譴又以故吏爲累由是累年沈廢今上卽
位徵爲水部員外郎改司農少卿判太常寺轉殿中監修
國史拜給事中權知貢舉又兼獻納使遷刑部侍郎公自
徵還數年間連厯清望蓋舊齒直道上簡聖心至是以老

病不堪朝謁聞上知其家貧詔以貳卿之秩養疾壬戌歲九月二十有三日卒於京師濱江里官舍享年七十有五遺命以周易孝經置棺中太常考行易名曰貞卽以其年冬十月二十有三日葬於江寧縣某所禮也夫人太原縣君郭氏代公元孫晉陵令喻之女也餘慶所備門風甚高婦德母儀聞於宗族一子僧孺祕書省正字早卒孫諤亦爲正字公之爲人寬簡真率常以詩酒自適不以勢利縈心毀譽譏慝之詞聞之晏如也從事楚公府殆二十年凡爲府公見知者皆詭譎傾側公獨淡然無營守正不諂故

但以文藝知賞未嘗任用烈祖下詔公卿舉可以親民者
楚公所薦非其人烈祖甚不悅謂給事中常公夢錫曰吾
望其薦匡舜也常公及中書侍郎韓公熙載嫉楚公如讐
而與公善嘗相謂曰宋公悞識亞元正可怪也公以歷任
奉法循理似不能言者及其臨危擊節抗詞忤旨侃侃有
古人之風黜官奪祿甘貧守約凡五年不形於言色恂恂
然道家之流也故能享老壽保康寧歸全委順斯可貴矣
公臨終數日舍弟往候之怡然言曰吾往矣君兄弟可各
爲一詩哭我翌日復告門生曰吾已得徐公兄弟許我詩

餘無事矣其忘懷死生也如此嗚乎絮酒之禮已隔平生
挂劍之信永畀天壤故以二章爲誌閱於九原所撰集七
十餘卷編紀之任屬於門人此不備書也

唐故左右靜江軍都軍使忠義軍節度建州觀察
處置等使留後光祿大夫檢校太尉右威衛大
將軍臨潁縣開國子食邑五百戶陳公墓誌銘

公諱德成字仲德其先潁川人也帝嫡餘烈侯滿崇封盛
德之祀綿邈於百世光遠之慶蕃衍於萬國故我洪胄代
雄建安王室中微閩方角立網羅英異宏濟艱難我曾祖

茂新祖滔皆以雄才勇畧奮揚忠力將領之任生表其策
勲督護之名沒垂於飾壤父誨檢校太尉兼侍中建州刺
史忠義軍節度使諡忠烈殊勲大節有信史豐碑存焉公
卽忠烈公之長子也鍾粹和之氣秉沖淡之心通習韜鈴
固其家法酷好墳典乃自天資就傅之年已著名譽先公
剖符劍浦威信洽聞諍子之助實有其力弱冠爲本郡裨
將先公以身守邊郡心存本朝累表遣公入宿衛卽擢拜
右千牛衛將軍充殿直指揮使恭命畏法修身擇交先公
每言邊事常密疏於紙遣公上啟默識強記敷奏閑習元

宗甚嘉之累遷右靜江指揮使值淮上兵起王師不振公
屢上書自奮詔隸西北面行營以舟師濟難破其屯戍遂
入海陵與諸軍會勵兵固守強敵日益公連戰破之虜獲
千計圍兵旣遁乃涉長淮指下蔡別率戰艦分擊浮橋三
中流矢神色自若自秋徂冬且戰且前凡五進軍壘皆以
眾寡不敵之勢當輕悍卒至之師臨難忘身每戰必捷而
元戎逗撓逆臣攜叛羣帥失道公全軍而還遷右宣威軍
廂虞候制曰獨此一軍之眾堪爲百戰之師其見稱如此
數月爲和州刺史又爲左天威軍廂虞候明年改池州刺

史是時疆場甫定間井未完公奉法循理正身率下庭無
滯訟吏不生奸鐵軸牙檣無忘水犀之備輕裘緩帶常爲
峴首之游賦詩紀頌粲然可述元宗南狩從至石碑上每
登臨置酒必命公陪侍訪山川之形勢問風俗之美惡應
對詳敏咸有條貫捧觴上壽進退由儀求解印扈蹕優旨
不許今上嗣服屢表乞還徵爲右天德軍都虞候舊制常
以舟師爲下軍至是詔旨以南國之用尚於舟楫今而後
知非是乃簡練精銳置龍翔軍以隸親衛命公爲龍翔都
虞候舟師之重自茲始也會先君來朝卧疾邸第公親侍

醫藥躬執煩辱容貌瘠損衣不解帶客至問疾者不知其
已貴也及丁憂制哀毀過禮扶護靈柩歸於建安詔起爲
歙州刺史本州團練使視事三載其理如初秩滿復爲右
龍翔諸軍都虞候遷都指揮使每仲秋講武訓兵仲冬而
畢進退號令由公指顧威容嚴整覩者肅然頃之又爲虔
州巡檢使知州事五嶺之際地廣民悍內據谿洞外接蠻
夷告訐敎敷習以爲俗於是申以刑政示以嚴明廣視聽
審情僞吏以微文出入者皆面詰其狀莫不惕息而退弊
爲之革人以之和於是浚溝隍嚴壁壘出私帑以助費因

農隙以偃功書勞考績此其昭昭者也尋拜池州觀察使以其秩居虔州上以建安之地人思舊德且欲以畫錦之盛顯公之能乃除忠義軍節度使建州觀察處置等使留後公以違奉歲久無以私爲抗表來朝固辭不拜改右威衛大將軍充左右靜江都軍使又轉光祿大夫檢校太尉奉以建州之祿歲計千萬甲第廢馬賜與優渥俄而被疾自識終期申告理命備有規度中使問疾但曰世受主恩未有以報唯此爲恨耳又親問門吏草遺奏旣成自益兩句曰苟游岱之有知必結草以爲報上省表震悼手詔答

之公猶捧詔向闕稽首流涕壬申歲秋七月十有二日卒於建業濱江里之官舍春秋四十上痛惜之至再不視朝贈安南大都護遣中使監護葬事皆從官給有司考行易名曰烈卽以其年九月日葬於某所從理命也夫人信都郡君刁氏故昭武軍節度使能之女容德之美閨房之秀宜家睦族先此門風子倩孝弟聰慧修詞好學以蔭起家授著作佐郎必大之慶其在於是嗚乎哀哉公生於戎馬之際長承鐘鼎之業修文習武全孝資忠風格端莊襟懷夷直嫉惡獎善如恐不及睦親念舊無有所遺先人之費

公私畢給出入數載家爲之貧在公之餘手不釋卷篇詠
詞筆皆傳於時近代儒學將唯公而已凡四理藩郡皆有
借留去思之美民到於今稱之由是恩顧特隆委遇無間
修塗方騁天年不登知與不知皆爲悲歎鉉與公非故特
以道義相期雖復出處不齊班序致隔金蘭之分終始不
渝寢門流慟痛生死之永已圓石表墓患陵谷之靡常亦
公之遺言以此見託豈非慷慨之氣思振發於知己哉故
爲銘曰

龍泉之靈武夷之英生我儒將垂茲令名臨戎有勇察俗

有聲爲臣之節與世作型位逼建牙秩參掌武才實膺時
忠惟得主鬱此雄圖溘然中露謂天蓋高不可以愬悲哉
俊氣永已荒邱鳳臺遺館梅嶺窮秋樹惟挂劍地卽眠牛
餘芳不泯淮水長流

唐故檢校司徒行右千牛衛將軍苗公墓誌銘

公諱延祿字世功其先上黨人昔者楚多淫刑賁始逃難
晉賴謀主苗受其封高門之慶雄視樂郤綿綿瓜瓞翼翼
孫謀存諸簡編可以揚摧延洪於我七代祖中書舍人延
嗣光大於我六代祖太師晉卿源流繁衍蔚爲甲族中朝

喪亂後裔播遷匿迹淮楚之間今爲盱眙人也先公諱鄰
生於兵戈之間長習旗鼓之用遭遇英主建功立事出爲
泗州防禦使入爲靜江軍統軍世卿之祀衰而復振公卽
靜江之長子也弱不好弄壯而有立負雄勇之量不以驕
人秉剛直之資未嘗忤物持重善戰默識寡言時輩推之
以爲君子初先公奉王畧領偏師南破山越西定江楚東
絕滄海北捍徐戎弓不解卷兵不匣刃公年甫弱冠實參
其間搴旗斬將所向披靡宣力用於君父舒壯氣於風雲
然而職以序遷蓋歸美於先公也烈祖孝高皇帝中興大

業疇咨舊人命公領泗上精兵入爲宣威軍裨將六卿之選以翼京師八屯之權實資宿衛厯紀受任一心靡渝今上祇嗣鴻圖益宣朝寄揔千牛之士以爲心膂假五教之秩以崇班列會侍中燕王以帝子之重兼鎮兩藩詳求命卿以事大國俾公提步卒屯宣城凡甲兵壁壘之事皆聽於公夙夜惟勤燥溼生疾春秋六十一保大九年十月七日卒於宣州公署上省奏傷悼爲之罷朝送終之禮有加等卽以其年十二月二十七日葬於江寧府縣里禮也夫人王氏淮南裨將唐之長女也先公負游俠之氣有征

討之功勇冠三軍力制奔虎夫人麗桃李之質襲蘭蕙之
芳婦禮聿修遺訓無墜君子以孝慈率教夫人以嚴正克
家閨門之理實有內助以保大八年五月一日先公而逝
今始祔焉子全厚全瞻全節全義全海皆有父風苗氏爲
不朽也鉉本自世親早爲姻族歎侯封於李廣發哀詞於
杜篤刻翠炎於荒阡擬高陵於深谷其銘曰

才之俊兮將之雄位之侯兮壽未中天難諶兮人云亡川
旣逝兮歲將窮素車兮丹旒白草兮青松悲雄心與壯氣
漸荆棘兮蒙朧

前知虔州零都縣令包府君墓誌

昔者鄭都涕產知懷仁之有誠孔門慟淵見福善之無驗
遺恨千古可勝言乎君諱詠字義修其先延陵人漢大鴻
臚咸之後也曾祖章祖岌皆眷戀本土卒於縣寮考洎遇
故侍中寶之亂乃去仕唐吉州長史入吳終和州厯陽令
政有遺愛故家焉今爲厯陽人也君幼而岐嶷長而學問
孝敬自律名利弗嬰安貧怡然綽有餘裕順義末丁先府
君憂泣血絕漿杖而後起朝廷獎勸善政砥礪淳風卽起
君爲厯陽主簿秩未滿移知含山縣令先是兵興之後循

吏用稀君簡法紓刑約廉敦信縣無逋事吏不能欺莅官
七考清嘯而已選授知虔州零都令西楚之地南際殊鄰
本之以蠻蜚之風因之以徼數之衆長鯨之戮雖久碩鼠
之刺猶繁君下車考政經察人病矯異俗均地征常爲諸
邑之最吏民上書借替期求真命者無虛歲矣而懋賞弗
臻成功輒去解印之日單車卽塗君素多疾至是增劇以
已亥歲秋九月十九日終於厯陽馴翟里之私第享年四
十有一以其年冬十一月六日葬於本縣本鄉許思里祔
先君長史之塋禮也君前娶潁川陳氏後娶樂安花氏皆

良家之子淑德不爽二子曰德容德鈞二女皆佩觿卣角之歲君天資貞吉立性和雅尊敬師友敦睦親姻移之於官故所至皆理而位不參於朝籍年不登於下壽能無遺恨乎鉉兄弟少孤長於舅氏親承撫卹勉以進修門構不傾君之力也嗚乎渭陽之贈已矣寧追西州之歎哀哉何極故拂貞珉紀述遺德庶深谷以徙遷見清芬之未泯

唐故常州團練判官檢校尚書左僕射劉君墓誌

銘

夫資忠全孝舍貞履潔君子所以沒身而守之聖人所以

屈已而申之其道可傳其風可仰嗚乎劉君其殆庶乎君諱鄱字巨源其先彭城人徙居廣陵重世矣曾祖永澧州司戶參軍祖審不仕考瓌檢校戶部尚書贈右僕射君生而岐嶷有異常童五歲而孤卽稟至性年在幼學卓然老成初先君仕吳寶幹近職而太夫人王氏與貞穆皇后復有姻舊故宣帝命君使事丹陽公府公龍飛以君爲殿前承旨便蕃左右靖恭夙夜勤必稱職人無間言二十年間累遷檢校禮部尚書充崇賢殿使及軍府代謝衆或將迎君侃然正色有死無二游說之詞不能入權利之勢不能

動於是闡豎希旨以飛語中之坐除名流池陽郡明年有唐受禪烈祖嘉君盡忠亟召之還除常州長史悉還其官階田宅未幾又改和州長史聽歸廣陵舊居初元宗方在膠庠吳帝使君召拜郎中賜以章綬自爾至於爲相每朝謁必先見君而後入及元宗卽位召至京師復命太夫人入禁中如貞穆之時謂曰吾受吳朝恩禮不敢忘也今猶數夢讓皇帝執臣子之禮吾觀當時近臣唯夫人兒爲長者帝意親之今復得在吾左右良足慰也君聞之遂稱足疾不任趨拜上仍賜第以居之歲時賜賚甚厚時使親近

諭旨竟不能移上乃加太夫人封邑召君受命於朝固辭以疾上歎息曰此子至孝今以其母故召之不來是必然也此亦古人所難吾何爲奪其節耶久之以君爲常州團練判官不使之任優其祿而已今上嗣位加檢校右僕射君家承鐘鼎之富少居綺紈之職時逢革故年甫壯室而遂閉門却掃高謝人間孜孜色養怡怡自得姻族以之肅穆士友以之景仰名節終始清風邈然丙寅歲夏六月某日終於建安某坊之私第春秋五十有九初君葬太夫人於茅山良常洞之西因自卜塋地卽以其年月日葬焉禮

也前夫人張氏早亡今夫人吳氏實有萊妻之賢能從伯
鸞之操天資玉映令問蘭薰子昭嗣女某等善慶所鍾家
聲不隕愛敬哀感在禮無違嗚乎令人其必有後鉉家世
通舊復連懿親常以君抗節遺世旣近代之孤標而元宗
推誠聳善又列辟之難事足以激揚薄俗垂示將來乃爲
銘曰

忠於事君孝於養親逢時有道以義衛身隱不絕俗居能
保真我永終吉誰爲古人地肺之原小茅之麓左盼崇岡
右瞻柳谷欒棘新吹松楸再卜令問昭顯流光似續刻此

茗華永芳蘭菊

唐故印府君墓誌銘

君諱某字某其先京兆人也因官徙牒遂居建康曾祖知章無祿早世祖某官考某官君幼而勤學長而力行孝悌著於家庭信義行於州里弱冠明經擢第釋褐太子校書千里之行時輩推許會上國喪亂遂南奔豫章連帥鍾公見而悅之辟爲從事豫章府變始歸建康井邑更移親舊泯沒君慨然悲世難之未已感宦路之多艱於是抗志衡門息機世表樂山水寡言語極談不過經籍之事足迹不

游卿相之門篤好六經歲誦再遍雖憂慘疾病未嘗廢也
孜孜焉修善如不及恂恂焉與人無間言保大丙寅夏四
月日考終命臨終訓勵諸子備有嚴誠如魏顥之命無莊
舄之吟春秋六十有九夫人徐氏通儒書有婦德先君而
逝卽以其年月日合葬於某所禮也子崇禮崇粲舉進士
崇簡明法及第爲舒州司法參軍秀茂之業聞於場中咸
以爲印氏之門其後必大諸子以我宗之自出故銘撰是
求銘曰

於惟穆氏代有君子恂恂若人亦旣克似退不邱壑進不

朝市體道居貞全高沒齒俊造之學施於後嗣昭昭令名與石無已

唐故銀青光祿大夫檢校國子祭酒御史中丞包君墓誌銘

君諱諤字直臣丹陽延陵人也粵我長源發於夏后分封受代著於會稽司農而後代有賢哲轉徙旁郡遂家延陵種德流光世爲大姓曾祖章丹陽令祖岌潤州錄事參軍考洎和州歷陽令業官之美播於氓頌公以廣明庚子歲生於丹陽長於戎馬之間遂好金鼓之政氣質慷慨而孝

於事親材用敏幹而慎於畏法命不我與事多無成高皇
帝兼總六師以輔王室署君牙門右職將進用之君以歷
陽府君喜懼之年辭歸就養因隸歷陽軍中自是服勤祇
役多在外郡家貧援寡仕不求聞三十餘年有勞無過養
心知命以保遐齡交泰元年春二月日卒於鄱陽舟中春
秋七十有九夫人危氏故賀州刺史諱德卿之女也婦道
以順家政以嚴內慎有光六姻是則子三人曰會宗曰穎
曰銳皆敬述先志勤修令名號奉靈輶俯就成制卽以其
年月日葬於江寧縣某里禮也鉉感深自出名謝貴甥載

悲渭陽之詩永痛西州之墅敬書遺懿以鏤貞珉其銘曰
猗歟府君世載其聞有道無命與俗同羣代耕得祿全和
保真享壽八十下從先人乃整歸舡秦淮之濱乃卜元宅
句金之陵不可不識封邱勒銘悠悠餘慶永永芳塵